

«Mantegnair plazzas da lavur e stgaffir novas»

Project d'ina zona da mastergnanza per la Val Schons

■ (anr/fa) Las vischnancas en la Val Schons prevesan da collavurar e da stgaffir ina zona industrial cuminaivla. Il project è vegnì declerà sco project da la Nova politica regiunala NPR. «Cun noss project d'ina zona da mastergnanza cuminaivla per tut la vallada vulessan nus attrair novas firmas ed al medem mument era dar als indigens la pussaivladad ed il spazi per sviluppar lur fatschentas», declera *Andrea Clopath*, il president communal da Ziràn-Reschen e commember da la gruppa da project «Zona da mastergnanza regiunala Val Schons», «noss'intenziun è en emprima lingia da mantegnair las plazzas da lavur existentas e da stgaffir novas da quellas plazzas.» Sco emprim han ins evaluà las pussaivladads che vegnissan en dumonda per ina tala zona cuminaivla. La concepziun en detagl nun è anc elavurada: «Ils detagls dal project vulessan nus definir integrond tant sco pussaivel la populaziun da la Val Schons.» Tge ch'igl è sco ch'el di gia definì è ch'i pudess dar ina zona da mastergnanza traptada en trais parts.

Sper Andeer, Bogn Pignia e Ziràn-Reschen

La gronda zona fiss al sid da la vischnanca dad Andeer en il cuntegn Runcs, gist sper la chava da crappa e gera. «Qua fissi lieu per bleras fatschentas, grondas e pitschnas, p. ex. firmas dal sectur da conctruziun, fatschentas dal sectur da servetsch u era biros», di



L'areal Zups, ina da las trais parts che furmassan la zona industrial cuminaivla.

FOTO P. GANZONI

Clopath. La segunda part da la zona da mastergnanza cuminaivla sa chattass a Bogn Pignia, a Zups, nua ch'igl exista gia ina zona industrial: «Questa zona è natiralmain pli sensibla, ella è en la natira sper la via chantunala, perquai avain nus ditg, quai duess esser ina zo-

na per fatschentas plitost pitschnas, tenor il motto 'klein, aber fein', menziuna il president communal da Ziràn-Reschen, ins veglia là dar anc dapli pais che en las autras duas parts da las zonas da construir edifizis che sa cunfashesan cun la cuntrada. Il terz lieu pussai-

vel sco part da la zona industrial cuminaivla è a Nislas, sut la vischnanca da Ziràn-Reschen ed al nord dal parcardi da l'enconuscenta baselgia son Martin. «La zona a Ziràn-Nislas fiss in lieu strategic per fatschentas turisticas, per beneventar ils giasts en la Val

Schons, e da commerzi, cun la pussaivladad da cumprar products indigens.»

Cun sustegn da la regio Viamala e dal chantun

Per evaluar las pussaivladads existentas per la zona da mastergnanza cuminaivla avevan elegì las vischnancas da la Val Schons, Ziràn-Reschen, Donat, Maton, Andeer e Ferrera ina gruppa da project. Quella è vegnida manada da la sviluppa-dra regiunala *Carmelia Maissen* da la regio Viamala. «Nus avain collavurà era cun ils uffizis chantunals da planisaziun e d'economia e turissem», menziuna Clopath, «l'evaluaziun da noss project è vegnida definida sco project da la Nova politica regiunala (NPR), nus avain survegnì sustegn finanziel or dal fondo da la NPR.» In segund project da la NPR en la Val Schons è tenor el uss la realisaziun da la zona da mastergnanza cuminaivla. «La gronda lavur entschaiva uss per definir tge che quess esser pussaivel nua, i dat differentas variantas per occupar las trais parts da la zona da mastergnanza Val Schons e per la finanziaziun», di Andrea Clopath, «la concepziun en detagl è anc averta.» Dacurt è vegnida infurmada la populaziun davart il project. La proxima sairada d'infurmaziun vegn ad esser ils 27 da mars ad Andeer, «quella duess esser in'ocasiun per discussunar las ideas e propostas elavuradas en differents lavuratori».